

勅修兩浙鹽法志

第一冊

序文

凡例

首卷

詔旨

卷一

疆域

部劄

總目



勅修兩浙鹽法志序


臣李衛奉

勅纂修兩浙鹽法志進呈

御覽兼請

欽賜序文奉

旨依部議



命臣撰文為序臣自惟愚
陋茲所修志書凜遵
現行事例上體

皇仁下詳民隱條分緒析
共計十六門凡諸程
式典章課則經費悉

載

會典者務相脗合勿致異
同猶恐編纂未當何
敢冒昧撰序聞
命之下惶悚彌切欽惟我
皇上聖神文武德盛化成

皇土天呈合璧之休徵地
命之獻河清之上瑞皞皞
熙熙萬物得所而猶
視民如傷凡事關經制者
必詳審經畫昭示法
守如食貨乃八政之

一而鹽又食貨之一
也部定鹽法考綱紀
秩如遵奉已久茲復
命直省鹽法衙門纂輯志
書因地制宜乘諸永
遠

聖人勞心為民至無已也
蓋我

朝鹽法自

世祖章皇帝洞鑒明季加派

妨商厲民定制按引

徵課

聖祖仁皇帝尤念鹽法一項

上關

國課下裕民生慎選廉
能加惠商竈至詳且
悉我

皇上甫承大統即

諭各省轉運道臣恤商裕
國又

諭巡鹽使臣搏節愛養繼
又於兩浙鹽務
命臣兼理具見我

朝

聖聖相承經制盡善我

皇上聰明睿知覃精繼述
即鹽法一事而網舉
目張德洋恩溥煌煌
詔令如日月經天其誰不
感動而激勸乎抑考

前明舊志成于嘉靖
丁酉修於萬曆甲寅
雖體裁悉具要皆董
是役者撫拾見聞自
為編次孰如斯志之
因草損益定自

宸衷為萬世法也臣忝司
封疆職叨兼任夙夜
祇懼惟有矢慎矢公
加意釐剔以仰副
聖天子體恤商民至意而
前此官吏陋規諸商

濫費復蒙

明賦諭商

皇上悉從寬典並予蠲除
命下以來大法小廉愈益
兢惕諸商則以既除
雜派又免積逋萬戶
千村歡聲雷動勤輸

國課惟恐後期更請設
鹽義倉積穀備賑蓋
上好仁而下好義有
由來矣茲蒙

上諭敬序成書用益導揚
聖德俾天下曉然知至治

之世百度修飭而凡
茲黎庶其共戴

皇仁於億萬年歟

雍正六年暢月

兵部右侍郎兼都察
院右副都御史總督

浙江等處地方軍務
兼理糧餉管巡撫鹽
政兼理江南七府五
州督捕事務加五級
紀錄三次 臣李衛奉

勅謹序

部劄

雍正三年正月初四日准

戶部爲請

旨遵修長蘆山東鹽法合志以憑恪守事山東清吏司
案呈戶科抄出該本部題覆長蘆巡鹽御史莽鵠
立題前事等因雍正二年十月二十二日題十一
月初九日奉

旨該部議奏欽此欽遵於本月初十日抄出到部該臣
等查得長蘆巡鹽御史莽鵠立疏稱鹽法有志所

東修河清縣志 卷首
以備法制而杜爭訟也場竈有圖戶口有數引票
有分地稅課有定規刻之版冊便於率由伏查康
熙十二年

聖祖仁皇帝勅下直省纂修府州縣志時長蘆山東鹽法
志書竟未重修其錢糧額引今昔不同場竈戶口
興革迥異且圖樣模糊冊籍殘缺實難稽考相應
題請

皇恩准臣率同長蘆山東運司分司等官協力纂輯梓
成全書繕呈

御覽并垂永遠等因前來查長蘆等處鹽法從前纂輯
至康熙十年止其錢糧之多寡引票之增減備悉
登載俱屬可考至康熙十一年以後鹽法雖經題
請奉

旨遵行但鹽法考並未重修其凡有興革事宜理應編
入以備稽查今該御史既稱長蘆山東鹽法志書
竟未重修錢糧額引今昔不同場竈戶口今昔迥
異且圖樣模糊冊籍殘缺實難稽考題請協力纂
輯以垂永遠等語應如該御史所題將長蘆山東

鹽法志書按年纂輯俟告成之日繕呈

御覽并照式送部以備查考其淮浙等處鹽法亦應照例纂修以垂永遠恭候

命下之日行文兩淮兩浙各該巡鹽御史并兩廣河東福建雲南四川貴州甘肅各該管鹽督撫一體遵行可也等因雍正二年十一月二十九日題十二月初三日奉

旨依議欽此欽遵抄出到部到司案呈到部擬合就行為此合咨前去查照本部覆奉

旨內事理欽遵施行

巡撫浙江等處地方提督軍務都察院右副都御史兼理兩浙鹽課事務加三級又加一級紀錄三次臣李衛謹

題為請

旨遵修長蘆山東鹽法合志以憑恪守事據浙江鹽驛道副使王鈞詳稱案奉管理兩浙鹽政謝賜履案驗內開雍正三年正月初四日准戶部咨開等因到院備案行道奉此該本道隨行寧紹嘉松二分

東傳曰法圖志卷三
司遵照設局開館廣徵文獻敬謹纂輯惟因兩浙
幅員遼濶兼之散佚百年蒐羅考訂實非易事既
不敢草率以滋挂漏又不敢因循以致稽遲今已
編輯完竣恭繕進

呈并謄清四部據兩分司申送前來理合具詳轉送
伏候核題恭進并懇

題請

御製序文冠於篇首垂諸久遠俾兩浙官吏商民永久
恪遵等因到臣據此該臣查得兩浙鹺志自前明

萬曆年間重修迄今百有餘年其中記載缺畧規
條散佚蒐考漸難編輯宜亟欽惟我

皇上御極以來典章文物昭若日星惟茲鹺志又蒙
特允廷議通行纂輯經前鹽臣謝賜履接准部咨遵行
鹽驛道纂修在案臣奉

命兼理鹽務時加稽督維悉心考訂不敢懈忽而學識
淺陋未盡周詳今已編輯完竣據鹽驛道副使王
鈞恭繕進

呈詳送前來臣覆加核明除另謄分送部科外理合

具

題進

呈

御覽倘蒙

聖明鑒定仰懇

皇上恩賜

御製序文冠於卷首臣當敬謹刊刻頒發齎屬并及各

商實億萬斯年永垂不朽矣伏祈

睿鑒施行謹

題請

旨奉

旨內閣議奏

戶部為遵

旨議奏事山東清吏司案呈內閣抄出准戶部咨戶科

抄出浙撫李衛為兩浙鹽法志書修成比照長蘆

之例恭請

御製序文冠於卷首等因具題奉

旨內閣議奏欽此欽遵到臣等衙門臣等查得前巡鹽

東修兩浙鹽法志 卷前
御史莽鵠立題請遵修長蘆山東鹽法志書准戶部議覆應如所請行令纂輯成書其淮浙等處鹽法亦應照例纂修以垂永遠等因具

題奉

旨准行知照各該巡鹽御史管鹽督撫去後嗣據兩廣總督孔毓珣雲南巡撫楊名時貴州巡撫何世璜甘肅巡撫石文焯四川巡撫馬會伯俱經修成鹽志陸續進

呈未曾請序惟巡視長蘆鹽政侍郎莽鵠立所修鹽

志因係畿輔重地蒙

皇上特允所請

欽頒御製序文刊刻在案今李衛遵修兩浙鹽志進呈并援山東長蘆鹽志之例懇請

御製序文臣等伏思鹽課地方甚多若使各處奏請宸翰似屬太繁查鹽政一切程式典章課額經費其大者載入

會典其詳悉者則地方大吏與董事各員深知原委今兩浙鹽法志書序文相應即令該撫李衛撰文

序述奉

旨纂修之由以昭

聖主恤商愛民之至意其已經修成之雲貴鹽志應交
 與總督鄂爾泰兩廣鹽志應交與總督孔毓珣甘
 肅四川鹽志應交與總督岳鍾琪各撰文一篇其
 未曾纂修告成之兩淮鹽志應交與巡撫陳時夏
 福建鹽志應交與總督高其倬河東鹽志應交與
 巡撫石麟各撰文一篇載入鹽法志書內可也恭
 候

命下之日臣等行文各該處遵行為此謹

奏請

旨雍正五年八月二十五日內閣等將所議鹽法志書
 請序一摺交與奏事張文彬等具

奏奉

旨依議欽此欽遵八月二十九日抄出到部等因前來
 相應行文各該督撫遵奉

旨內事理欽遵施行并知照兩淮河東鹽政可也為此
 合咨前去查照施行

凡例

一兩浙鹽法舊志剋於明嘉靖丁酉侍御劉仕賢迄萬曆甲寅叅議王圻重修距今百有餘年記載缺如遺文散軼雍正二年

皇上特允長蘆使臣之請

勅直省管理鹽法衙門一體纂輯成書恭呈

御覽甚鉅典也伏稽歷代鹽筴隨時變遷遞有因革至明邊中海支之設法制漸密而姦弊益滋洪惟

聖朝酌古準今因時損益悉屏前明諸弊政而一歸於

東晉四法監志 卷前
惠民恤商立法盡善著之典冊誠可垂萬世而不
敝者故全志專紀

本朝鹽法而舊志所載謹從畧簡

一歷代詔令載在史書詳矣或旨遠而文繁或義豐
而理質惟我

盛朝

聖聖相承善繼善述凡裕本經久之謨足國富民之道悉

斷自

宸衷發為

渙汗如日月之經天江河之行地昭一代之大法定萬
世之章程鹽政大綱包舉靡遺故恭繕

詔旨於卷首而歷代詔令別附於沿革之內

一舊志分條析緒名例頗繁今總為一十六門而分
系細目於其下其有不能兼舉者亦以類從附見
一志例每卷各系小序所以標一卷之大凡也茲首

卷恭紀

詔旨為全志之綱領謹傳承修

御書之例下列恭錄職名而不敢序論尊

王言也

一直省各有封域上應星野下紀職方界畫井然釐
為定制惟鹽政經界其煎鬻則視海沙之蟬聯其
糴易則計道路之徑便故兩浙得割兩江之郡縣
以附麗焉疆域既與直省不同圖志應合三省並
列至浙鹽不入之地即非兩浙經界更不旁及
一山川古蹟俱分見於郡邑各志茲專載鹽法無庸
濫入但各場所亦有舊隸之原陞與疏濬之川渠
興廢之祠宇碑版之舊蹟為輿圖通志所未載者

均附疆域之內以備觀覽

一土訓有道地圖之掌而凡志各有圖蓋圖其一定
之土則也場竈向有分土第瀕海斥鹵坳長不時
不無今昔之異如舊志載三十五場今已汰其三
之一若熬煮之地為亭為圍又不知其幾經遷易
矣非系之以詞豈能一覽盡悉故每圖各附一說
而官署所解併類及之

一歷代沿革記載甚繁第泛論鹺政而與浙省無關
者悉不具錄其有通立一法而浙省自在其內者

東仁兩津鹽法志 卷前
即為浙鹽之法例得備載

一課稅名目不一今總為解額故以課額盡之至各屬分徵均照額徵解並附於課額之後

一正引票引俱載定額而銷引有分掣代銷之不同故附以分銷之法而歲額無壅墮之虞矣

一編戶為食鹽之數竈丁為出鹽之數或登或耗所繫不綦重歟郡邑志止載地丁而不分民竈舊志止載亭戶而不及編氓今並核而各書之不惟於產鹽食鹽之數可按籍而稽亦以昭王者拜民數

之義也

一凡奏議經奉

旨准行者即為定例悉開載現行則例內但其間多有文繁義富例內不及詳載者亦有雖經准行後復更定者原文具在茲別為奏議一卷第篇帙浩衍難以備錄祇擇其有關切要者登之或全文詞義冗長畧從刪節

一前代奏疏指陳鹽政利病鴻篇麗製美不勝舉茲志專錄

本朝例難並摭第擇其最著者收入藝文節存其概

一派則章程既詳載律例使人皆知恪守矣但部屋窮簷及販夫販婦知識顛蒙恐未能盡悉

王章之所在職司巡察者爰著為條教以示通曉然不過疏律令之義例而出以淺邇之言俾人易於知識遵循而已非於律例之外別有條約也其間或因時制宜或因勢利導或權宜於一時或維持於經久擇其斟酌至當現在頒行者存之以見一時法制之詳云

一鹽官制置代各不同舊志仿史漢例作職官表考據尚多缺畧今遵

本朝官制按其職守表其世次而各載書目於本文之上以備參考

一歷代名宦其豐功偉業載在史冊者班班可考原不徒以鹽事表見也茲專志鹽法如旁及他政則轉多挂漏故止載鹽官之蹟其不係鹽官而有裨鹽政者均收入沿革志內亦不敢沒其實也

一經攢工役皆廩食

王餼協辦公事例得備列其數以便查核因隸鹽官所掌故附於職官之末

一商籍雖始於前代而額設特廣於

本朝蓋

朝廷所以弘作人之化亦為趨事赴公者之勸也故商籍人文兩浙尤盛紀科目而併及貢選者一以徵國家儲材之富一以覘多士報稱之殷方翕聚而未
有艾也

一浙省人物俱載郡邑各志惟商籍皆非浙人而久客於浙其間豈無潛德隱行忠孝節烈之事卓卓可紀者郡邑志或以其非浙人不盡登載而各商本籍又以其久客於浙未獲周知因而湮沒不彰者有之今照各志例分載人物列女於商籍之內而竈籍亦得附書

一文章為經國之大業所以紀政令寓風教為關於治忽不鮮故凡志之記載獨詳惟鹽法特重賦稅而律度量衡之設每為學士謳吟所不及舊志所載蓋寥寥焉茲聞見既渺蒐羅未徧故於歷代藝

文並存什一於千百以備考索其編輯所未逮者
尚俟增訂續入

一直省雖有分地而鹽政事宜大畧相仿今同事編
纂自宜畫一但各省鉛槧伊始未有成書故義例
率難比附惟部定天下鹽法考洵為禹筭權輿用
資準則或不致大相徑庭耳

勅修兩浙鹽法志

總目

卷首

詔旨

卷一

疆域 行鹽地方 產鹽地方 附 星野 山川 古蹟

卷二

圖說 行鹽地方總圖 各場圖 各所圖 附 解字圖 書院圖

卷三

沿革

卷四

課額

正課 雜餉

縣場課 滴珠

功績 雜徵

牙稅 捐解

包課

附

分徵

經費

卷五

引目

正引

票引

派額

附

分銷

生引

退引

卷六

場竈

各場分隸

團額

鍋盤

煎辦

鹽斤

色味

場地

卷七

戶口

食鹽戶口

煎鹽戶口

卷八

律例

大清律

現行則例

卷九

掣執

季掣

捆運

出場

到所

附

例限

卷十

成式

引式

票式

水程式

由單式

串式

帖式

牌式

卷十一

奏議

卷十二

條約

卷十三

蠲恤

卷十四

職官

職官表 官紀 宦蹟 附 官俸 役食

卷十五

商籍

科目 貢選 人物 列女

卷十六

上

藝文

上 制表 狀 議 書 疏

卷十六

下

藝文

下 序 跋 記 志 銘 七 辭 詩

東修河清縣志 首卷
徵課

順治四年六月十七日戶部面奉

聖諭興販私鹽屢經禁約近聞各處姦民指稱投充滿洲率領東兵車載驢馱公然開店發賣以致官鹽壅滯殊可痛恨爾部即出示再行嚴禁有仍前私販者被獲撻八十鞭其鹽斤銀錢牲口車輛等物俱入官巡緝員役縱容不行拏緝者事發一體治罪特諭欽此

順治五年六月十六日戶部面奉

上諭前因地方姦民架引滿兵與販私鹽已傳諭爾部行

文嚴禁犯者捉獲到官滿兵撻八十鞭鹽斤牛驢車輛銀錢等物盡行入官近聞近京地方土棍串通滿兵車牛成羣攜帶弓矢公然販賣私鹽以致官鹽壅滯殊可痛恨除已傳諭各固山牛彘嚴行禁止外爾部即刊刻告示再加申飭如有仍前違旨販賣私鹽者不論滿漢許地方巡緝員役擒拏解部依律治罪鹽斤等項入官爾部仍差人密訪如地方官員并巡鹽人役容隱不舉事發一體連坐特諭欽此

順治八年三月初八日內三院捧出

東傳兩河鹽課志 卷一
上傳朕於本月初六日親覽巡鹽御史崔育弘章奏因思
及各處報鹽課中常報有餘銀若干細思鹽課正額此
自應徵解若課外餘銀非多取諸商則侵尅於民大屬
弊政傳戶部都察院通行各鹽差御史及各鹽運司止
許徵解額課不許分外勒索餘銀如有貪縱御史及運
司各官許商民指實赴部院首告審問確實奏聞治罪
用布朝廷恤商裕民之意該部院各刊刻告示通發京
城內外及各督撫按遍傳內外道府州縣鹽運等司著
實遵行特諭欽此

順治十二年正月二十七日

上諭河東長蘆等處各運司鹽課原應商人辦納中有每
年派民納課而民不見升合之鹽者著該運司詳加稽
核從長計議務令公私兩便經久可行毋得因循積弊
特諭欽此

順治十二年十一月二十九日

上諭吏部都察院國家設立巡方御史原為察吏安民之
本首在懲貪必按臣先能以廉持已奉公守法然後有
司有所畏憚不敢貪婪害民近初遣顧仁等巡方時曾

東修河清監卷之三
召至太和殿面諭巡按已經止息因此官關係甚重吏治貪廉民生利病皆由此上達故復遣爾等往巡直省地方朕即倚爲耳目手足爾等當體朕意潔已率屬莫安民生若不法受賄負朕委任不拘常律但得銀一兩一錢定行處死又召至左翼門再加申諭往聞巡按官初至地方亦能虛博廉名及至差滿回日多婪取贓物爾等若蹈此弊初至廉名俱置不問必照貪例處分朕屬望如此殷切戒諭如此嚴明即當洗滌肺腸痛除積弊乃顧仁輒敢背旨壞法收蠹納賄朕親行審鞫情真

罪著已經正法訖合通行天下嚴加禁飭以後各巡方御史及巡鹽巡漕巡倉巡視茶馬各御史但有這等違法受賄犯贓即行處斬定不寬宥爾等即行傳知特諭
欽此

聖祖仁皇帝

順治十八年十二月二十五日

上諭戶部鹽課錢糧關係軍國急需聞內外大小官員勢豪之家多有貿易販鹽倚勢不納課銀巡視鹽課官員不畏勢力不徇情面盡心催徵者即能多得課銀其畏

勢徇情者即致課銀虧欠以後管鹽各官多得課銀者著以稱職從優議敘額課不足虧欠者以溺職從重治罪其官員貿易倚勢漏課情弊該管官須嚴加稽察參奏本主一併從重治罪巡鹽等官如仍前徇隱定行一併從重治罪不饒爾部即遵諭行特諭欽此

康熙四年三月初五日欽奉

恩詔內開

一直省順治十六十七十八年催徵不得各項舊欠錢糧著照蠲免十五年以前錢糧一體蠲免前侵盜庫

銀不赦今俱著并免其鹽課積逋催徵不得者著察明亦准酌量蠲免

康熙七年三月二十三日

上諭吏部戶部都察院鹽課關係國賦最為緊要必得廉能之人差遣乃能嚴緝私販惠恤商民疏通引法以裕國課近見課額未增商民又未有裨益之處以後不必但將監察御史專差應將廉能之人選擇兼差爾部院酌量定議具奏特諭欽此

康熙九年十月十一日戶部題覆兩淮巡鹽御史

東傳西法圖志 卷之五
席特納題請嚴革私費等事十四日奉

旨各處鹽差官員因循陋規巧立名色額外私派苦累商民深為可惡據席特納等所奏准商六大苦掣摯三大弊等項情節俱實各鹽差積弊作何禁止官員作何處分著再嚴加明白議奏欽此

康熙十六年五月十一日戶部奉

旨鹽課關係國用各處巡鹽御史理應潔已奉公據實奏報如有將割沒等項銀兩以多報少侵隱情弊發覺之日必從重治罪決不饒恕著通行嚴飭爾部及都察院

仍不時稽察差回嚴加考核欽此

康熙十七年三月十二日

上諭吏戶兵三部朕統御寰區孜孜圖治期於朝野安恬民生樂業共享昇平乃副朕宵旰勵精之願不意逆賊吳三桂背恩煽亂各處用兵禁旅征勦供應浩繁念及百姓困苦不忍加派科斂因允諸臣節次條奏如裁減驛站官俸工食及存留各項錢糧改折漕白二糧顏料各物增添鹽課鹽丁房產稅契牙行雜稅官戶田地錢糧奏銷浮冒隱漏田畝嚴行定例處分用過軍需未經

報部不准銷算以上新定各例不無過嚴但為籌畫軍需早滅逆賊以安百姓之故事平之日自有裁酌各省督撫提鎮大小文武等官俱宜上體朕意下念民生潔已奉公愛惜物力務期早奏蕩平與民休息以稱朕乂安海宇至意爾三部即通行傳諭遵行特諭欽此

康熙二十年十二月二十日欽奉

恩詔內開

一康熙十七年各行鹽地方起增閏月課銀除已完外如有拖欠者該巡撫御史查明具題到日豁免此後

閏月停其增收

康熙二十四年四月二十七日戶部奉

旨盜販私鹽屢經嚴禁未見杜絕皆因地方經營各官不實心奉行以致仍多私販著九卿詹事科道會同確議具奏欽此

康熙三十三年十二月二十日戶部等題為請

旨事會議得各關鹽差每年額徵稅課外餘剩數目酌量加增作為正數以充兵餉等因二十一日奉

旨依議這加增銀兩俱出於該差官員所私得贏餘之數

不得借端於定額外多徵貽累商民欽此

康熙三十八年三月初四日大學士伊桑阿等奉
上諭直隸廣平府知府石佳彝年久操守好用度簡省著
補兩淮鹽運使於正項錢糧之外伊每年應得者儘足
伊用度存留餘俱解送河工兩浙長蘆兩廣河東福建
此五處運使等亦照此俱解送河工將伊應得之分若
不拏出亂派商人從重治罪特諭欽此

康熙三十八年四月初二日

上諭戶禮二部朕子育黎元勤求治理日孜孜以施德澤

厚民生為急務而江浙二省尤東南要地朕時切軫念
比歲以來蠲豁田賦賑濟凶荒有請必行無災不卹雖
漕項錢糧向未蠲免者亦曾經特旨蠲免愛養之道備
極周詳庶幾民生日益康阜用是乘輿時邁於視河事
竣巡歷江浙諮訪民間情形見淮揚一路既困潦災而
他所過州縣察其耕獲之盈虛市廛之贏絀視十年以
前實為不及此皆由地方有司奉行不善不能使實惠
及民所以小民雖懷愛感之誠而朝廷恩澤卒不下究
朕目擊塵懷亟思拯卹截留漕糧寬免積欠已另有諭

東作兩河鹽法志 首卷
旨惟各鹽差關差向因軍需浩繁於正額外令在差官員以所私得贏餘交納充用今思各官孰肯自損私橐勢必仍行苛取商瘠民困均坐此弊著將加增銀兩一槩停罷以紓商民之累其兩淮鹽課康熙十六年曾加增四十萬兩今恐商人辦課維艱漸至匱乏著減去二十萬兩此外有應行應革事宜朕還都以後仍加商確次第舉行該督撫藩臬皆地方大吏亦著悉心體訪凡有可爲民興利除害者作速勘實陳奏嚴革雜派禁止刁訟然後胥吏不能作姦良民得以安業倘官吏有悖

旨妄行者許商民首告該督撫察出即行叅奏朕視民如傷惟恐一夫不獲其所茲值海宇昇平兵革不事正當與民休息之時故特渙沛德音減徵寬稅以爲閭閻留有餘之力萬一嗣後別有急需或不得已而稍議加增想在小民亦能共諒朕懷輸將之恐後也至於江南浙江人文稱盛入學名數前已酌定增額今著於府學大學中學小學各增五名舉行一次以示獎勵人才至意爾二部即遵諭行特諭欽此

康熙四十四年五月初十日大學士馬齊等奉

上諭今看得私鑄小錢販賣私鹽者甚多如何嚴行禁止之處著戶部定例具奏欽此戶部議覆奉

旨九卿詹事科道會議具奏欽此經九卿等議覆六月二十一日奉

旨舊鑄錢展限之事著另議具奏其私鑄錢之人并販賣私鹽者斷不可寬免此事進京之日著大學士等九卿大人會同議奏欽此

康熙四十六年十二月初九日

上諭刑部漕船往來河道運丁人等夾帶私錢私鹽並裝

載一切貨物遇有稽察員役動輒抗拒傷人放火誣賴沿途商民船隻悉被欺凌種種不法之事甚多朕所深悉漕運總督倘不嚴察懲處則運丁恣意橫行必致重為民害這案著該督再行確審定擬以為悍丁生事病民者之戒特諭欽此

康熙五十三年三月十六日治儀正俊子員外郎雙全將浙江行鹽商人汪宏茂等所奏恭

進

萬壽龍衣一襲彩緞四十端

東傳兩浙鹽法志 首卷
貢銀二萬兩黃摺交與該班學士巴格傳

旨這摺子交與該部議奏欽此戶部議得應將商人等所進衣緞行文內務府照數查收其伊等

貢銀應行令兩浙巡鹽御史委員解交廣善庫等因
本月二十三日摺奏本日奉

旨衆人進貢物件俱不曾收伊等進貢物件不必收他著發還銀兩補還伊等現欠銀兩於伊等亦有裨益欽此

康熙六十年十二月初十日大學士馬齊戶部尚書孫查齊等奉

上諭聞得江浙私鹽甚行盡爲盜賊地方官員明知並不

查拏應著江南浙江京口將軍等派出官兵嚴行查拏俟回鑿日孫查齊爾同九卿詹事科道會議具奏特諭

欽此

今上皇帝

雍正元年正月初一日

上諭各省道員爾等官歷僉司所以贊襄藩臬承流宣化者也分守分巡職居協理糧河鹽驛各有專司身居是官必顧名思義名者實之華也克副其實而後

東修河清縣志 卷之四
名歸焉如守巡兩道首當潔已惠民凡府州縣之廉
潔貪污俱宜細加察訪不時密詳督撫以憑舉劾地
方有土豪武斷尤宜禁戢翦除衛良鋤莠乃稱其實
若但知趨承大吏或祇圖下屬陋規一切吏治民生
槩置不問貪庸陋劣殊負朝廷設官之意矣糧道專
理漕運職任匪輕使徒知起運規例扣剋運費苦累
運丁營私煩擾有玷官箴貽害百姓何所底止河道
有董率工程之責凡分修河員孰賢孰否俱應洞悉
並宜親身經歷查勘估計某口險峻某口平易某處

隄工堅固某處冒支帑金倘不計虛實不辨勤惰僅
以納賄多者為能員餽遺少者為拙吏而於工程漠
不經意一遇坍塌誰之咎耶鹽道一官尤關國課邇
年鹽法弊竇叢生正項錢糧每多虧欠一由上下各
官需索商人巧立名色誅求無已窮商力竭不得不
那新補舊上虧國課高擡鹽價下累小民至於官鹽
騰貴貧民販賣私鹽捕役鬪毆株連人民流弊無窮
一由商人用度奢靡相仍陋俗不知節儉致欠額徵
爾等運籌鹽法宜將陋例積習盡情禁革必思何以

蘇商何以裕課上供軍國下利閭閻方為稱職驛道
為驛站錢糧所係必廉潔自守乃可剔弊釐姦凡驛
遞馬匹數目多寡每有假冒開銷歲修船隻亦有虛
浮不實該員一貪貨貨勢必昏庸或過於苛覈勒索
多方經管屬吏疲不能支總之病官病民悉緣貪黷
敬爾有官垂諸古訓靖共爾位載在風詩爾等各
有常職各守官方名實二字極宜體認今以獻賂為實
虛譽為名動云名實兼收內以欺已外以負國有靦
面目其何以立身而抒忠盡乎

皇考御極六十餘年以軫恤民生為首務各省道員必親
加遴擢諄諄戒勉極其詳慎朕纘承大統翼翼小心
惟仰體

皇考愛養元元至意亦期爾等爭自濯磨振飭風憲以副
朕望果能肅清綱紀無致廢弛朕當破格獎勵其或
因循不改朕必置之重法特諭欽此

雍正元年八月初二日奏事員外郎雙全等捧出
上諭諭各省鹽院國家欲安黎庶莫先於厚風俗厚風
俗莫要於崇節儉周禮一書上下有等財用有度所

東傳兩浙鹽法志 卷之六 首考
以防僭越禁驕奢也孟子亦曰食時用禮菽粟足而民無不仁朕臨御以來躬行節儉欲使海內之民皆敦本尚實庶康阜登而風俗醇夫節儉之風貴行於閭里而奢靡之習莫甚於商人朕聞各省鹽商內實空虛而外事奢侈衣服屋宇窮極華靡飲食器具備求工巧俳優伎樂恒舞酣歌宴會嬉遊殆無虛日金錢珠貝視爲泥沙甚至悍僕豪奴服食起居同於仕宦越禮犯分罔知自檢驕奢淫佚相習成風各處鹽商皆然而淮揚爲尤甚使愚民尤而效之其弊可勝

言哉爾等旣司鹽政宜約束商人嚴行禁止出示曉諭諄切勸戒使其痛自改悔庶循禮安分不致蹈僭越之愆而省一日之靡費即可以裕數日之國課且使小民皆知警惕敦尚儉約於民生亦有裨益庶不負朕維風振俗之意若仍前奢侈不知悛改或經朕訪聞或被督撫叅劾商人必從重究治爾等亦不能辭徇縱之咎特諭欽此

雍正二年二月初二日

上諭各省關差鹽差從來關權鹽稅之設所以通商裕

東傳河漢縣志 首卷
國或用欽差專轄或令督撫兼理無非因地制宜利
商便民之至意也朕前於關鹽兩差各下諭旨誥誡
諄切但旗員向來相沿成習陽奉陰違任意侈靡不
知撙節額外加派苦累商民差滿之日惟恐回京有
當差効力之事每以闕額懇求寬限希圖掩飾是以
不憚叮嚀再加申飭大抵關差之弊皆未講日計不
足月計有餘之長策惟知目前小利恣意侵漁聽信
家丁縱容胥吏開關分別遲早肆無厭之誅求報單
任意重輕為納課之多寡飽谿壑者則任其漏稅代

為朦朧不遂欲者則倒篋傾箱一物不免致商賈畏
懼裹足不前行旅徬徨越關迂道則困商實所以自
困也鹽差之弊尤合重懲飛渡重照貴賣夾帶弊之
在商者尤小加派陋規弊之在官者更大若不徹底
澄清勢必至商人失業國帑常虧夫以一引之課漸
添至數倍有餘官無論大小職無論文武皆視為利
藪照引分肥商家安得而不重困賠累日深則配引
日少配引日少則官鹽不得不貴而私鹽得以橫行
故逐年之課難以奏銷連歲之引盡皆壅滯非加派

之所致歟故關差惟在嚴禁苛求使舟車絡繹貨物
流通則稅自足額鹽差惟在力除加派使商困少蘇
盡復舊業則課自贏餘至於督撫係封疆大吏更當
仰體朝廷歸併之意關政不得視為帶理漫不經心
誤任屬員聽其剝削鹽政不得因恤窮商獨專厚利
硬派州縣計口徵錢夫權關部屬尚有顧忌恐督撫
持其短長今歸督撫則何所瞻顧巡鹽御史地方官
或不奉約束今歸督撫則孰敢抗違況欽差猶每年
更換而督撫兼理則無限期若不實心奉行使風清

弊絕則大負歸併之本意矣至將耗羨充課固屬急
公但恐以耗羨歸正額而正額之外復加耗羨商民
重輸疊出何以堪此朕深悉關鹽擾累之害垂念商
民營逐之苦特諭爾等經理權稅者務期奉公守法
遴委得人知商旅之艱辛絕箕斂之弊竇通商即所
以理財足民即所以裕國如自利自便罔上行私責
有攸歸其悉遵朕旨特諭欽此

雍正二年五月十六日

上諭浙江巡撫黃叔琳聞浙江沿海一帶窮民多赴場

竈販鹽餬口今值雨水調勻農夫力作之候爾須乘
此時諭令歸農民始得所其有不能歸農者可會同
噶爾泰酌議或暫令其即於場竈納課以開資生之
路或以庫銀買竈戶餘鹽以杜私販之門從前地方
官員以鹽務為無預已事任其破壞甚非和衷共濟
之義爾當與鹽院協同商議實心辦理務期鹽政無
虧方為有益嗣後凡有關於鹽政無礙於地方可以
變通之處勿拘成例即行奏聞特諭欽此

雍正二年八月二十日奉

上諭覽噶爾泰摺奏現今海潮漫大鹽廩漂沒頗多沿
海州縣田產民人大受其患等語正在有事之時佟
吉圖料理兩三處印務力量不能著石文焯馳驛速
往浙省署理巡撫印務石文焯到時將被災人民作
何撫字作何賑濟之處一面料理一面奏聞該部速
行特諭欽此

雍正三年五月十七日奏事安泰捧出

上諭戶部去歲江浙海潮衝溢沿海場竈淹沒之處甚
多兩淮鹽政所屬地方經噶爾泰奏聞朕即發帑賑

恤并將雍正元年二年竈戶未完折價銀四萬餘兩
悉行蠲免其兩浙鹽政所屬地方該巡鹽並未將被
災之處題報今謝賜履以摺奏聞去秋海濤漂決情
形兩浙與兩淮無異朕博施一體之心務使率土均
霑膏澤著將華亭婁縣上海海寧餘姚蕭山慈谿等
縣雍正元年二年未完場課銀兩悉行蠲免該鹽政
通行曉諭俾各場丁戶人人得霑實惠將已未完場
課數目確查報部倘有不肖有司將已完作欠或借
端朦混私行重徵者即指名題叅若隱匿通同後經

察出將該鹽政一併從重治罪該地方督撫仍嚴加
稽察毋使吏胥中飽以副朕勤恤窮丁普濟同仁至
意爾部即遵諭行特諭欽此

雍正四年五月浙江巡撫兼理兩浙鹽務臣李衛
條奏為請廣文武分任緝盜之法以盡職守以杜
推諉事部議以毋庸議題覆八月二十四日奉

旨這事情部議乃是守經李衛所請乃是行權李衛實
心辦理地方事務自因本地情形故行條奏且浙江
素多私鹽理應嚴加緝捕著李衛所請於浙江一省

試行一二年再看欽此

雍正四年十月初十日內閣交出

上諭諭戶部去年莽鵠立奏稱竈地久未清查以致民竈爭控不已請將竈戶灘地從前售與民人者許其回贖如無力者仍許現在耕種之民收租納糧俟原業竈戶有力之日再行回贖等語經九卿議覆准行近聞當年竈地轉售與民其年分久遠有百餘年者業主售主多半變更即有子孫當時價值多寡亦俱遺失或有逃亡等戶更無從質問以致同姓影響之

人彼此爭贖紛紛告訐實滋煩擾若必俟原業竈戶有力之日回贖倘原業之人始終無力則此項地畝久久竟成民地亦非清查竈地之良法朕意以爲不若將竈戶賣與民人之地交易年近確有實據者令竈戶備價取贖其餘年久被失之地所有爭告無憑詞告該衙門俱行註銷凡民人所有竈地嗣後止許賣與竈戶永遠爲業如有仍轉行典賣與民者照盜賣官地律治罪永以爲例如此則數年之後竈地自漸歸於竈戶而無不清之弊矣爾部著即行文著山

東巡撫長蘆巡鹽御史遵照實心奉行特諭欽此

雍正四年十月二十一日內閣交出

上諭諭各直省督撫從前戶部春秋二撥歲底大撥之時各省俱有講求冀免撥解京餉以致藩庫錢糧虛收捏報掩飾彌縫之弊不一而足自怡親王總理戶部以來凡事秉公持正於撥餉一項皆斟酌地方遠近詳核錢糧多寡皆據實預先奏朕定奪後方行分撥四年以來毫無假借各省亦應曉然明白矣乃聞向有愚昧之人私囑吏役暗行賄賂以冀免撥其巧

為遷避者將實存數目不盡開報蓋緣各省督撫身處遠方不能深悉戶部撥餉悉出至公乃為吏胥之所愚弄耳茲特曉諭各該督撫嗣後春秋二季報冊務將藩庫所有實存銀兩悉行開報應存應解靜候部撥並令督撫等咸知吏胥斷不能弄法增減切勿為人所愚行賄請托朕既經曉諭之後倘有再犯者一經發覺將與受俱按律治罪決不寬恕特諭欽此

勅諭

勅都察院左副都御史謝賜履茲命爾巡視兩浙鹽課

東傳兩浙鹽法志 卷一
察照戶部所定運司分司場竈官丁亭戶照例統理
該管各府州縣額引照舊督銷凡邊商內商正課餘
鹽引目俱屬爾徵核該管衙門官吏胥役宜嚴加約
束使恪遵法紀毋致作弊生事擾害商民不得委官
察盤借名訪惡取贖科贓並該衙門公費犒賞等項
通行減省蘇商竈之積困裕國課之本源仍博採利
弊斟酌損益至於江海鹽徒私販公劫嚴行衛所有
司緝捕防杜亂萌但不許另外生事苛求勿得將貧
難小民負鹽易食者概行擾害如鹽政有應會督撫

衙門須與叅酌施行所屬行鹽司道府州縣官員有
怠玩溺職貪取侵課凡干涉鹽政應爾完結者即行
完結應叅奏者具疏叅奏請旨處分爾仍兼管該省
水利漕糧事務必須如法疏濬以時催集勅中開載
未盡事宜聽爾酌便請行爾受茲委任須持廉秉公
剔姦釐弊通商裕課斯稱厥職如或貪黷乖張因循
怠玩貽悞國計責有所歸爾其慎之故勅

勅兩浙都轉運鹽使司兼管浙江清軍驛傳事務鹽驛
道副使王鈞茲以兩浙鹽賦通省驛遞水利向各專

東仁河海關志 卷之四
司今務歸併茲命爾為鹽驛道務要約束衙門官吏
胥役俾恪遵法紀無致作弊生事擾害商民監司本
源既正方可表率屬僚用循職業鹽道事務爾宜招
徠商人嚴察場竈戶丁徵核正課應行引目及派銷
斤引明則例以示綏懷飭捕役以緝私鹽省虛費以
速徵納剔侵蠹以疏積壅察照戶部覆議鹽政逐款
舉行凡行鹽地方該管州縣悉聽管理所屬各官如
貪污溺職縱役侵漁應審問者先行審問應劾奏者
呈報巡鹽御史劾奏勅中開載未盡事宜有應斟酌

損益裕國便商者呈報巡鹽御史商確妥當具奏施
行爾聽巡鹽御史併該督撫考成驛道事務爾宜整
飭郵傳舖舍計應夫馬船隻凡內外差遣奉有勘合
火牌俱要察驗明白果無情弊方照數應付務俾隨
到隨應毋悞師行其驛遞額設錢糧及協濟銀兩嚴
加稽核及時催發清理開銷毋容官吏作弊侵欺如
有姦徒假借冒濫盡法究處有員役枉道騷擾及違
例需索者揭報督撫叅拏治罪浙屬河道俱資灌溉
民田今既歸爾兼理務須確勘及時修濬所屬官員

東在兩浙鹽法志 首卷
有貪殘溺職者轉報該督撫叅處爾仍聽督撫節制
年終將行過事蹟開送該督撫咨部察考爾受茲委
任須持廉秉公釐姦剔弊務使商竈輻輳國課充裕
官吏勿擾徒役無怨斯稱厥職如或貪黷垂張病商
虧課因循怠玩貽悞地方責有所歸爾其慎之故勅

勅修兩浙鹽法志首卷終

勅修兩浙鹽法志卷一

疆域

八政食貨隨地得相流通鹽爲食貨之一而獨嚴
越境之禁所以絕私竇而溥利源也故立政之始
必正其經界而經界以內凡可以通準望備睹記
者亦附見焉志疆域

行鹽地方

國朝鹽筴之行自兩淮外無廣於浙者東迤海北距揚
子江西盡歛信之域南暨甌閩之交所食者皆浙

東坡志林卷一
鹽也其界三面鄰淮鹽而一面與閩之鹽接故以
省計之行者三曰浙江曰江南曰江西以郡計之
行者十有七其隸浙江者十一曰杭州曰嘉興曰
湖州曰寧波曰紹興曰台州曰金華曰衢州曰嚴
州曰溫州曰處州隸江南者五曰蘇州曰松江曰
常州曰鎮江曰徽州隸江西者一曰廣信以州計
之行者二曰太倉隸江南曰廣德亦隸江南有不
概其郡而行其郡所屬之縣者一曰江南江寧府
之溧陽縣

浙江

杭州府為浙江省城置兩浙都轉運鹽使司領縣九
附郭之縣二曰仁和曰錢塘府東之縣一曰海寧
府西之縣二曰富陽曰昌化府西南之縣一曰新
城府西北之縣三曰餘杭曰臨安曰於潛浙西地
兼行浙東西引鹽內附郭及海寧餘杭俱行票引
餘俱行正引其昌化縣北七十五里至江南之寧
國府界接淮鹽境

星野

附

清類天文云杭州牛女分野府志云杭州斗十度
入漸臺下

嘉興府去運司二百里領縣七附郭之縣二曰嘉興
曰秀水府東之縣二曰嘉善曰平湖府西之縣一
曰桐鄉府東南之縣一曰海鹽府西南之縣一曰
石門浙西地行浙西票引內嘉秀善桐四縣兼銷
正引

星野

嘉興舊志云斗二度入吳嘉興分屬斗十一度

湖州府去運司一百八十里領州一領縣六附郭之
縣二曰歸安曰烏程府西之縣一曰長興府南之
縣一曰德清府西南之縣二曰武康曰孝豐府西
北之州一曰安吉浙西地行浙西引鹽其安吉之
西南一百二十里至江南寧國府界接淮鹽境

星野

浙江通志云湖州亦斗分

寧波府去運司四百四十三里領縣六附郭之縣一
曰鄞府西北之縣一曰慈谿府西南之縣一曰奉

化東南之縣一曰象山東北之縣二曰鎮海即舊
 定海治康熙二十六年又析定海之舟山建縣曰
 定海浙東地行浙東票引惟定海新設地居海外
 難以行運照江南崇明縣例計丁派引止徵包課

星野

張時徹云郡之所占斗牛女之次

紹興府去運司一百四十三里領縣八附郭之縣二
 曰山陰曰會稽府東之縣一曰上虞府西北之縣
 一曰蕭山府西南之縣一曰諸暨東北之縣一曰

餘姚東南之縣二曰新昌曰嵊浙東地內惟諸暨
 一縣行浙東引鹽餘七縣俱銷票引

星野

虞翻云會稽上應牽牛之宿當少陽之位張衡曰
 入牛一度

台州府去運司八百六十三里領縣六附郭之縣一
 曰臨海府南之縣二曰黃巖曰太平府西之縣一
 曰仙居府東北之縣一曰寧海西北之縣一曰天
 台浙東地行浙東引鹽

東修兩浙圖志卷一
星野

陶弘景云天台山當牛女之分上應台宿府志云
臨海屬牽牛四度

金華府去運司五百三十里領縣八附郭之縣一曰
金華府東之縣一曰東陽府西之縣一曰蘭谿府
南之縣一曰武義東南之縣一曰永康東北之縣
二曰義烏曰浦江西南之縣一曰湯溪浙東地兼
行浙東浙西引鹽

星野

洪遵云東陽郡於天文上直婺女

衢州府去運司六百四十里領縣五附郭之縣一曰
西安府東之縣一曰龍游府西之縣一曰常山府
西南之縣一曰江山府西北之縣一曰開化浙東
地兼行浙東西引鹽其江山之南一百二十里至
福建之浦城縣界接閩鹽境

星野

李氏釋義云兩浙當南斗須女之分而衢又浙之
東南則星分在牛女審矣西洋又推以爲斗四

度

嚴州府去運司三百一十里領縣六附郭之縣一曰建德府東之縣一曰桐廬府西之縣二曰淳安曰遂安府西南之縣一曰壽昌府東北之縣一曰分水浙西地兼行浙東西引鹽

星野

戴廷槐云嚴州南斗須女之分

溫州府去運司一千二百六十里領縣五附郭之縣一曰永嘉府東北之縣一曰樂清府西南之縣二

曰瑞安曰平陽府西北之縣一曰泰順浙東地行浙東之鹽其平陽之西南一百一十里至福建之福寧州界泰順之南三里至壽寧縣界俱接閩鹽境

星野

漢書地理志粵地牽牛婺女分野舊志云永嘉屬牽牛四度

處州府去運司一千九十八里領縣十附郭之縣一曰麗水府東之縣一曰青田府西之縣二曰松陽

東... 卷一
日遂昌府南之縣二曰慶元曰景寧府北之縣一
曰縉雲府西南之縣二曰雲和曰龍泉府西北之
縣一曰宣平浙東地行浙東引鹽其龍泉之西南
一百六十里至福建之浦城縣界慶元之西三十
里至松溪縣界南五十里至政和縣界俱接閩鹽
境

星野

浙江通志云隋因處士星見置處州舊志云斗女
分野

江南

蘇州府去運司三百六十八里領縣九附郭之縣三
曰吳曰長洲雍正三年析長洲置縣曰元和府東
之縣二曰崑山析崑山曰新陽府東南之縣二曰
吳江析吳江曰震澤府北之縣二曰常熟析常熟
曰昭文地近嘉所者掣銷杭嘉二所引鹽凡五縣
地近松所者掣銷松所引鹽凡四縣

星野

姑蘇志云屬斗六度

松江府去運司三百六十里領縣八附郭之縣二曰華亭曰婁雍正三年析華亭置縣曰奉賢在府東南析婁置縣曰金山在府南府東北之縣二曰上海析上海曰南匯府西北之縣二曰青浦析青浦曰福泉向掣浙西票鹽自建所後掣本所引鹽

星野

陳繼儒舊志云吳地斗分野松江居吳之正東則為斗之分野無疑

常州府去運司五百三十三里領縣八附郭之縣二

曰武進雍正三年析武進置縣曰陽湖府東南之縣二曰無錫析無錫曰金匱府南之縣二曰宜興析宜興曰荆溪府東之縣一曰江陰府東北之縣一曰靖江靖江北三十里至泰興縣界逼近淮竈且孤懸海濱商艘難以行運題定照崇明例計丁包課餘七縣俱掣銷杭嘉二所引鹽

星野

清類分野云吳分野斗牛在丑自斗三度至女一度

東作兩河鹽運志 卷一
鎮江府去運司七百四十三里領縣三附郭之縣一
曰丹徒府東之縣一曰丹陽府東南之縣一曰金
壇俱掣銷杭嘉二所引鹽丹徒之北二十里即達
江都界行淮鹽府北揚子江為浙鹽門戶設搜鹽
廳彼此不得越境

星野

唐書地理志云潤為星紀分

徽州府去運司六百八十里領縣六附郭之縣一曰
歙府西之縣二曰休寧曰祁門府東北之縣一曰

績溪府西南之縣一曰婺源西北之縣一曰黟掣
銷杭紹二所引鹽休寧之北一百里至寧國府之
太平縣界婺源之西一百里至江西之饒州府界
南四十里至南昌府界祁門之南九十里至浮梁
縣界北五十里至池州府之石埭縣界黟之西北
五十里俱至太平縣界績溪之北三十里至寧國
縣界俱接淮鹽境

星野

徽州府志云故丹陽地入斗當十六度

太倉州去運司四百七十二里雍正三年陞太倉爲直隸州析州建縣曰鎮洋又析嘉定縣爲寶山益以崇明爲四縣而以州領之附郭者鎮洋州南曰嘉定曰寶山州東北曰崇明崇明在大海中向不行引康熙十八年間題定計丁派引照浙東溫所課則徵納包課本州及餘三縣俱掣銷松所引鹽

星野

太倉州志云入斗六度六十一分起七十二分廣德州去運司四百五十里領縣一州西之縣曰建

平掣銷杭嘉二所引鹽州西一百里至宣城縣界建平之南九十里至寧國縣界北四十里至高淳縣界俱接淮鹽

星野

清類天文云廣德斗分

溧陽縣屬江寧府去運司六百里東接宜興西連廣德皆浙鹽境向食淮鹽明季改食浙鹽掣銷杭嘉二所正引其西八十里至溧水縣界北八十里至句容縣界俱淮鹽境

星野

石氏星經云斗六星魁第一星主吳第三星主丹陽志云溧陽實丹陽故境則分野屬斗三星

江西

廣信府去運司九百三十里領縣七附郭之縣一曰上饒府東之縣一曰玉山東南之縣一曰永豐府西之縣一曰弋陽西北之縣一曰貴溪西南之縣二曰興安曰鉛山俱分銷常山縣引鹽其貴溪之西四十里至饒州府界接淮鹽境又南一百一十

里至福建之光澤縣界鉛山之西南八十里至福建之建寧縣界俱接閩鹽境

星野

晉天文志豫章入斗十度分野圖說云廣信居七度

產鹽地方

國賦出於鹽鹽產於竈竈有場場有轄浙鹽初凡三十五場遞相裁并今為二十三場其徑轄於運司者二俱在杭州曰仁和曰許村其轄於嘉松分司

者九在杭州曰西路在嘉興曰鮑郎曰海沙曰蘆
瀝曰橫浦在松江曰浦東曰袁浦曰青村曰下砂
其舊場之裁并者四曰蘇州之天賜曰太倉之青
浦及松江之下砂二場三場其轄於寧紹分司者
十二在紹興曰錢清曰三江曰曹娥曰石堰在寧
波曰鳴鶴曰清泉曰穿山曰大嵩在台州曰長亭
曰黃巖在溫州曰長林曰雙穗其舊場之裁并者
八曰紹興之西興曰寧波之龍頭長山玉泉曰台
州之杜瀆曰溫州之北監永嘉南監

杭州府

仁和場在仁和縣東北二十都去運司一十五里東
至海寧縣界五十里西至富陽縣界七十里北連
仁和縣民里南至錢塘江

山川

附

月輪山 場西南二十里瀕江形如月頂廓爲月
輪

五雲山 頂列五峰高出雲表南北二峯拱其下
長江三折繞其前

定山 一名獅子山高五十丈橫出江中吳越時習水戰於此有帥臺存焉下為定山浦

浮山 瞰江心與對岸漁浦諸山錯出江濤至此瀕洞若浮蘇軾石門河狀極論其險下皆鹽場

課地

錢塘江 本名浙江一名浙河又名漸江又稱曲江又名羅刹江有潮隨月盛衰詳載浙江通志

西湖 場西六里一名錢塘湖漢時金牛見湖人言明聖之瑞遂稱明聖湖以其負郭而西又名

西湖周繞三十里計三千六百頃瀦武林諸山之水下達運河以通漕東合臨平湖以灌仁和

錢塘海寧三縣民田而中通郡城內外諸河以達鹽運自唐宋元明以來屢經濬治歲久日就

湮塞

本朝雍正二年工部為請開水利等事覆

准浙閩總督查議開濬西湖一疏內稱城外上下兩

塘水源皆自西湖流注蓄洩及時可無饑歲宜

照舊址清出開通水源其城內之河通西湖血

脈利益商民淤淺處亦宜開濬附入工費報銷
應將前項工程交鹽驛道經管雍正三年鹽驛
道王鈞捐助挑濬工程銀四萬兩欽奉

特旨議敘自是西湖得還唐宋之舊而諸運河亦皆通
復如故商民利賴焉

臨平湖 場北四十里通運鹽河吳赤烏二年寶

鼎見湖漢末壅塞晉咸寧中復開

上倉運鹽河 由沈家橋沿慶春門城河過會安

壩

中倉運鹽河 由橋司鎮出東方橋過臨平大河
東倉運鹽河 由臨平河進艮山門

古蹟附

石節官塘 即錢塘水經記載錢塘記云防海大

塘在縣東一里許郡議曹華信家議立此塘以

防海水募能致一斛土者與錢一千旬月間來

者雲集而不復取載土石者皆棄去塘以之成

故名錢塘梁開平四年錢鏐以潮水晝夜衝齧

命強弩數百射之既而潮水避錢塘遂置鐵幢

三以制水更造竹絡積巨石植以大木宋景祐中復壞兩浙轉運使張夏採石修塘隨損隨治俗呼石節者仍錢鏐竹絡積石之義也煎鹽竈舍皆聚於此

護水土塘 宋嘉熙間潮由海門擣月塘頭民廬坍者十里詔趙與權除端明殿學士知臨安任修築與權奏先於傍近築土塘為救急之術然後內築石塘募夫工軍卒三千餘人夾植椿笆版木晝夜運土填築越三月畢工水復其故

范公塘 嘉熙間又自團圍頭石塘近江築擦水塘長六百丈俗呼范公未詳何據或云

國朝浙閩總督范承謨修築

昭貺廟 在渾水閘祀宋兵部尚書郎張夏夏字伯起景祐中出為兩浙轉運使築石堤以防江濤上至六和埕下至東青門州人德之慶曆中廟於堤上賜今額

國朝雍正三年奉

勅加封靜安公

東修河... 卷一
協順廟 祀宋陸圭及其三女以衛築江岸功也
宋淳祐中賜今額甬有小廟祀十二潮神各主
一時

六和塔 在月輪山甬錢氏築以鎮江濤後燬紹
興中復建塔中有宋理宗真武像康伯可等寫
佛說二十四章經李伯時畫普門大士像俱石
刻塔院名開化寺有金魚池噴月泉持正泉鐵
井欄刻八卦以鎮水怪

許村場在海寧縣安化坊去運司五十五里東至西

路場十五里西至仁和場四十里南至海北至海
寧縣民里

山川

巖門山 高九十九丈巍峩峭拔巖岫蟠迴號為
主山宋時設鹽場於此

赭山 高七十五丈周三里西南界仁和與紹興
龕山南北對峙為江海門戶瀕海一帶皆鹽竈
文辦課地向為旗營牧馬蹂躪康熙十四年間奉
文勒石禁止

蜀山 在巖門東十里宋時設鹽場

文堂山 明永樂初以沿海扼要徙赭山巡檢於

上在赭山東半里

陳村港 場東二十里運鹽赴掣由此達運河俗

誤呼陳墳港

馬牧港 場西一十二里

古蹟

海塘 距縣城百步東抵海鹽西抵浙江唐書地

里志鹽官海塘長一百二十里開元時重築按

重築云者疑不始於唐也天祐四年吳越國築捍海石塘一名太平塘宋曰海晏塘鹽場竈舍悉聚於此

鹽官城 隋大業十三年築縣北四十一里

買納場 縣南二百步太平興國四年置總出納

八場鹽課解在鹽倉西榜曰鹽監

張文忠祠 祀宋侍郎張九成場西五里淨居寺

側有墓紹定二年給祀田三百畝元大德間坍

沒撥許村場沙蕩二百二十八丈抵給贍墳祭

祀

安國寺 縣西北俗呼北寺唐開元間建名鎮國

海昌院有雙檜蘇軾詩咏之後為朱勔移去有

大悲閣梅檀千手眼觀世音像蘇軾撰記又有

宋理宗御書妙智之閣又有異井深十三丈今

場署在寺東巷內

西路場在海寧縣東六十里去運司一百五十里東

至海鹽縣談山界三十里西至陳墳路二十里南

至海洋北至桐鄉縣界三十里

山川

花山 場東南十里坦衍蟠薄如岡如陀山多白

鷗火鳩亦茂松竹

葛嶺山 在花山東三里

笠山 在葛嶺東一里

望夫山 立烽堠其上山巔有石盤盤側立石澗

水志云昔有海商失期不返其妻登盤望夫泣

隕化而為石因名

小尖山 場東南十四里翠律崛起南臨大海上

有高峰周一里最為險要建烽堠墩臺於上鹽場竈舍多聚其下

譚山 南唐譚峭景昇得道處

烏龍山 舊名烏山唐天寶間置烏山戍今廢

鷹窠頂 在海寧縣治南三十里俗名南陽山又名雲岫山山頂可觀日月並出

黃道河 在場東四十里舊名鷓鴣湖上有黃道神祠俗因以名與海鹽錯壤徐泰志曰鷓鴣湖西受硤川之流是也場鹽運掣俱經由此河

黃灣浦 場東三十里圖經有黃灣開建鹽倉

白彈港 袁花塘河之支派

古蹟

英濟侯廟 俗稱捍沙王廟相傳蕭山布衣張某素溺海為神或曰即張夏

報功祠 祀倡義減鹽課諸人初自明萬曆二十五年天啟二年重建在西路場西倉明陳與相

撰碑記

嘉興府

鮑郎場在海鹽縣南澉浦地方去運司一百九十六里東至海沙場界一十里西至西路場界八里南至海洋北至運河水塘

山川

秦駐山 場西南十二里輿地志謂始皇駐此故曰秦駐水經注謂始皇登以望海故曰秦望晉樂資九州志謂始皇逕此美人死葬於山上下有美人廟故名秦逕實一山也宋澉水志秦皇石橋柱在秦駐山背

青山 澉浦鎮之主山也隱若龜形亦名為龜山山上置粉堠瞭海望若白雲之羃嶺

大步山 即長山上有神廟澉水志云蓋潮神也葫蘆山 宋澉水志元嘉禾志並云四望絕在海中如葫蘆出沒狀今山半在平地

麂山 以形似名場西南與颶山連

鳳凰山 形似鳳之展翅

譚家嶺 與海寧縣分界

澉浦 水經注谷水出為澉浦以通巨海元至元

東作河海鹽志 卷一
間宣慰楊耐翁居此招集商民貿易遂成聚落
明洪武中始築城

國朝康熙五十七年添築砲臺防海

鮑郎浦 宋志曰古老云昔鹽場初開於此有姓
鮑者鑿浦煮鹽因名其浦又按南史載孫恩作
亂縣令鮑陋遣子嗣之追恩戰沒喪歸於此人
憐而名之

東浦 宋志云在澉浦鎮東海水透入東北至礪
頭門汲之煮鹽

六里河 自城壕石灰橋西抵六里堰古上河也
兩旁之田實賴之居民造小船運鹺賈引鹽一
作用里

古蹟

秀野堂 在鮑郎場鎮解之西宋嘉定中司場朱
俯立常棠記云堂中設米老詭畫蔡邕焦琴

海沙場在海鹽縣十六都沙腰村去運司一百五十
里東至蘆瀝場界一十八里西至鮑郎場界四十
里南至海北至海鹽縣民里六里

山川

秦駐山 見鮑郎場下

雅山 嘉禾志山多怪石俗呼為蒼山又呼為瓦山地中得磚記知是雅山

乍浦 亦曰乍川水自官河出達於海

藍田浦 上有藍田廟遂名宋咸平六年知縣魯

宗道濬以灌田民利之名魯公浦紹熙三年縣令李直養又自藍田開十八里南抵鮑郎場以

通運鹽

古蹟

乍浦所 在海上明洪武間築城永樂正統景泰嘉靖崇禎歷朝俱有增修

潮音寺 在雅山下

白苧橋 場西北運鹽河

轉塘橋 場東北

馬涇橋 白苧橋東

蘆瀝場在平湖縣新倉鎮去運司三百二十里東至橫浦場界二十五里西至廣陳鎮一十二里南至

東作... 卷一
海塘一十八里北至華亭縣山塘一十二里

山川

獨山 亦曰獨有山上有烽埃防海舊置鹽場於此

鹽運河 宋置榷場於廣陳明改置蘆瀝故有鹽運河十二里土積水淤嘉靖間鹽院董威命郡縣修復立石余塘橋左邑人陸杰有記

新開河 在鹽運河東自新倉閘橋起至舊衙止計十二里明嘉靖間知縣顧廷對濬又名顧公

河

蘆瀝浦 宋元祐八年本路提刑羅適開地中得古尼寺碑移置松江白牛寺後於此地立鹽場又熙寧六年土人傅肱欲導海鹽之蘆瀝浦以分吳淞入海正此處又邨亶稱為卹瀝浦

古蹟

鎮海庵 在獨山東柯孫氏建有滅海寇異蹟
通山閣 在蘆瀝場宋嘉定中清江劉昌詩興叔為場官著蘆浦筆記十卷自序云書於通山閣

松江府

橫浦場在松江婁縣二十七畝地方去運司三百四十四里東至袁浦場界一十八里西至蘆瀝場界四里南至大海北至張涇堰一十九里

山川

小金山 場南海中楊維禎云余嘗北渡揚子訪金山之勝而不知淞之南又有所謂大金小金出沒於雲海之中如壺嶠之在弱水外也

橫浦 北通故邑西達賁湖南入於海在海鹽縣

東二里明初置鹽課司於上遂名橫浦

朱涇 一稱珠溪在胥浦鄉六里古於此置大盈務中有東西法忍寺昔詩人稱為落照灣謂自府望落日於此也

古蹟

胥浦塘 相傳伍子胥所築浦上有伍胥祠

橫灤塘 一作橫瀝

浦東場舊在婁縣仙山鄉今屬金山縣去運司三百五十里東至漕涇鎮三十里西至橫浦場界六里

東修河... 卷一... 南至海北至張涇鎮十二里

山川

青龍江 昔孫權造青龍戰船於此故名唐置鎮其上宋改通惠後復舊名設監鎮有學有倉水陸巡司茶場酒務為海舶輻輳之地人號小杭州元以後廢明嘉靖間曾建青浦縣於故址之西今猶稱舊青浦云

新運鹽河 自金山衛城北流長六十三里凡西南諸小水皆由之以入於海初在查山東後以

風濤之險改浚於裏護塘外人呼其東為舊運

鹽河

古蹟

張涇堰 一名張溪宋人堰海十八所之一鎮浦

東鹽課司舊設於此後以牢盆相遠別建官衙於堰南鎮故有嶽祠居人楊竹西有不礙雲山樓今廢

搬運倉 在張涇宋乾道八年置主運浦東場鹽

袁浦場在華亭縣柘林鎮地方去運司三百九十里

東至青村場三十六里西至浦東場五十四里南至海塘一里北至華亭縣七十二里

山川

黃浦江 古之東江禹貢三江之一也戰國時黃歇鑿其旁支流後與江合土人稱為黃浦或又稱春申浦運鹽由南橋河出江

上橫涇 場西通柘林城

百尺涇 場西通運鹽河

古蹟

柘林 地連柘山鎮海人輻輳之處何元朗兄弟讀書於此有傲園今廢

柘林城 明嘉靖間築城濬壕

柘林堡

東海神壇 明洪武中建

方廣寺 唐咸通中建蔡侍郎功德院也宋建隆中賜額延壽改方廣始為院後為寺有蔡侍郎祠其墓亦在寺側石幢猶蔡故物題云唐咸通六年蔡贊助緣寺有觀音廟里人鄔氏得像海

東修兩洲監志 卷一
中而見夢於僧法元迎歸祀之禱無不應至今
祠焉

法華橋 跨下橫涇

南橋 一名南梁

東西袁浦二墩 明洪武間築

青村場舊在華亭縣十五保青林今屬奉賢縣去運
司四百三十里東至大海西至高橋鎮二里南至
袁浦場界八里北至下砂場界十八里

山川

運鹽河 自青村鹽倉北流納諸水西由岡涇塘
出浦北由閘港出浦

古蹟

南塘橋 在淺沙塘北

青村城 明洪武年築永樂萬曆間修

下砂場舊在上海縣十九保新場鎮今屬南匯縣去
運司四百五十里東至海西至黃浦三十六里南
至青村場二十四里北至川沙界

山川

運鹽河 自下砂場東循海塘北行以通諸團鹽
運每團各有支渠其北至青浦止

下砂浦 舊亦名鹽鐵塘世傳吳越王爲此以運
鹽鐵因名宋紹興間通判曹泳開港浦一十八
處鹽商舟楫往來交通改名曰浦

馬路浦 在新場鎮北

周浦 一名杜浦元置下砂鹽場杜浦巡司於此
宋詩人儲泳故里也永定教院在焉鶴坡古蹟
鄰於其右

閘港 自新場西流入黃浦下砂浦在其北

鹹塘河 自下砂場北流

沈莊塘河 在下砂浦北

古蹟

下砂 一名鶴沙舊有鹽課司後遷新場而鹽倉
則自周浦徙居之今亦廢宋丞相吳潛侍父讀
書處鎮多巧工精刺繡稱下砂繡云有鶴昔稱
華亭鶴即此

新場鎮 元初遷鹽場於此故名今爲下砂場鹽

東... 卷一
課司一名南下砂一名石筍里當元時北橋稅
司杜浦巡司皆徙此歌樓酒肆賈街繁華縣不
是過也

鶴沙義塾 元皇慶間縣人雅州太守瞿時建今
廢

方氏義塾 在鹽課司南明嘉靖間里人方鏞建
何繼之洪富各有碑記

紹興府

西興場在蕭山縣西興鎮去運司三十里東至蕭山

縣一十里南至諸暨縣界四十里西至錢塘江北
至錢塘江

山川

荏山 俗呼長山孔靈符地志云越王種荏於此
在西興南一里

蕭然山 又謂之蕭山漢書地理志餘暨縣蕭山
潘水所出今下有潘泉井

北幹山 場東北四里其巔曰玉頂峰舊經曰晉
許詢家於此許詩所謂蕭條北幹園者也其麓

有泉曰幹泉

錢塘江 見仁和場下

運河 自西興鎮經蕭山縣入於錢清江長五十里

湘湖 蕭山縣治西二里宋神宗時濬政和二年楊時壘土為塘詳具縣志

古蹟

西興鎮 錢武肅王鏐屯兵處古西陵也惡陵字改曰興

北海塘 自長山之尾東接龕山之首橫亘四十里

固陵 浙江南路西城越絕書云范蠡敦兵城也其陵固而可守謂之固陵

長山閘 其港直通大江自古通客商舟楫之所寧濟廟 祀浙江潮神宋政和間賜今額

護堤侯廟 在長山之麓宋建以祀漕運官張夏咸淳間賜額俗謂之長山廟又謂之張老相公

廟

江公祠 祀梁會稽郡丞江革在慧濟院之左即
取石亭舊址也按梁史革字休暎考城人也為
會稽郡丞行太守事緣道饋迎一無所受在官
惟資官俸正已裁物姦賊吏望風解印綬去遷
官將還都唯乘臺所給一舸舸漕偏欹或謂當
徙重物以迓輕漕公既無物便令於西陵岸取
石十餘片實之以渡後人思公建取石亭宋楊
時即其址立祠以祀公明蕭山魏驥復葺焉
西興城隍廟 號水固王廟

中隱庵 宋至道中建

明化寺 唐長興三十年吳越王建名化度院宋

景德三年改今額

慧濟院 即西興茶亭

江聲草堂 在西興鎮今廢

錢清場在蕭山縣鳳儀二十四都地方東至夾竈三
十里西至批驗所四十里南至興塘埠二十里北
至海塘十里

山川

東修河漢記卷一
鳳凰山 場東北三里至小而具山形嘗有鳳集故名

烏風山 一名龜山濱海當潮生時遠望之如龜出沒水中今名白洋山南麓為巡檢司

雷山 在海中潮至此其聲如雷

航塢山 場西北二里舊經云句踐之航也三百石長負卒七十人渡之山巔有湫曰白龍井

鰲子山 與海寧縣赭山對峙又云鰲子門

錢塘江 按舊志即浦陽江也漢太守劉寵有惠

政山陰數父老齋百錢送之寵選一大錢投於江遂呼曰錢清江今已通運河江廢

古蹟

錢清鎮 舊有江有壩今江堙壩亦廢舟行由運河直抵西興

劉太守祠 祀漢劉寵唐曰靈應廟宋改封靈助侯舊在山陰禹會鄉元至正間移建於錢清鎮北臨江有一錢亭

三江場在山陰縣陡壘鎮地方東至車家浦五十里

東... 卷一
西至青墩三十里南至鹿山運鹽河一十里北至
大海五里

山川

金帛山 場南五里其嶺有九龍池

羊石山 上有石佛

馬鞍山 場西五里唐天寶間改名人安山

古蹟

三江應宿閘 在三江所城西門外明嘉靖十六
年紹興知府湯紹恩建凡二十八洞亘堤百餘

文蓄山會蕭三縣之水歲久閘稍壞萬曆十二
年知府蕭良幹增石修之改其近岸旁四洞為
常平閘用洩漲水陶諧有建閘記張元忬有修
閘記

玉山陡壘 唐貞元間觀察使皇甫政建凡七門
泄山會蕭三縣之水出三江口入海明嘉靖間
三江閘建而三縣無水患陡壘之啟閉已廢

張大帝廟 在陡壘閘上自昔題請祀宋漕運官

張行六五者即張夏明嘉靖間湯紹恩築三江閘

以神有捍海滅倭功立廟祀之

湯公祠 在三江關上祀明郡守湯紹恩

國朝雍正三年

勅封寧江伯

曹娥場在會稽縣曹娥鎮東至曹娥江百官渡一里至石堰場界五十里南至三界四十里北至三江場界八十里西至縣八十里

山川

馬目山 場東北八里按水經注曹娥江濱有馬

目山洪濤一上波隱是山勢淪岫亭歷數縣行者難之

金雞山 在下竈之前世傳有金雞二鳴石上遂迸裂

龜山 在曹娥江西岸

夏蓋山 無奧谷深井卓然一頑石高出天半舊傳夏禹嘗駐蓋焉

曹娥江 按十道志即浦陽江也以娥溺於此故易今名江中有落星石

夏蓋湖 在夏蓋山南唐長慶二年鄉民爲之引
灌永豐上虞寧遠新鄉孝義五鄉田兼有菱芡
芙蓉菱葦及魚鰕之利俗謂日產黃金方寸

古蹟

虞舜廟 在舜山之陽

曹娥廟 即孝女廟宋熙寧十年著祀典大觀政
和淳祐屢加封號嘉定間郡守汪岡壘石廟外
爲堤七十丈又建娥父曹府君及朱娥祠俗呼
救婆者也至建熙十年會稽令董楷移朱娥配

享廟中明嘉靖四年知府南大吉復廓之以合
郡烈女從祀兩廡焉娥墓即在廟旁其事蹟具
後漢書列女傳及會稽典錄邯鄲淳碑中
石堰場在餘姚縣龍泉一都二堡地方去運司三百
七十里東至鳴鶴場三十里西至上虞縣六十里
南至餘姚縣二十里北至海際三十五里

山川

歷山 場北十二里相傳舜所耕也下有田曰象
田有井曰舜井舊經云舜支庶封於餘姚歷山

東化兩洋圖志卷一
舜井之類皆子孫思舜故鄉取像於此非必舜所耕鑿也

流亭山 元時始建鹽課司於此其下為石堰

禾山 謝康樂云山海經有浮玉山今餘姚北禾山即浮玉山

屯山 晉孫恩屯兵於此

肴山 海中望之如修眉

客星山 以上有嚴子陵墓得名

梅梁山 宋理宗御書梅梁之山相傳燭湖旁舊

有大梅樹伐以為梁其一在郡之禹廟一留山

中風雨時居人每震其靈異去鹽場南六里

燭溪湖 舊經云昔有人夜行迷失道見二人乘

燭夾溪因得路遂以名溪

女仇湖 計九百七十二頃北角填臨山衛基

上林湖 湖水自斗門北行折而之東至於石堰

北至於海

古蹟

通明壩 在縣東三里宋嘉泰元年置海潮自定

海歷慶元南抵慈谿西越餘姚至北堰幾四百里地勢高印潮至輒回如傾注鹽船經此必候大汛若重載當俟則百舟坐困旬日不得前於是增此壩分導壅遏以通官民之舟而北堰專通鹽運宋蔡肇明州謝上表云七堰相望萬牛回首蓋自浙江抵鄞有七壩茲乃第五壩也

嘉福院 宋建炎間建紹興賜額褒忠禪寺

寧波府

鳴鶴場在慈谿縣市鎮地方去運司四百一十里東

至鎮海縣龍頭場四十里西至石堰場四十里南至車廐驛六十里北至觀海衛一十五里

山川

鳴鶴山 形如鶴翅舒而喙張有飛鳴之狀故名或曰唐元和間虞九臯字鳴鶴第進士鄉人因以名其所居山

向頭山 場北十里亦名西龍尾東望伏龍山與龍頭相向龍頭以東屬定海龍尾以西屬餘姚二山捍潮其中漲塗漸與山接今盡為魚鹽地

東平府志卷一
下置向頭司城

浪港山 在觀海衛城之陰

杜湖 唐刺史任侗浚築溉鳴鶴一鄉之田名為
第二重天宋慶曆初主簿周常修閘著作郎倪
思碑記之歲久不存

白洋湖 與杜湖相連西界餘姚

運鹽河 鳴鶴場之東北

古蹟

松浦閘 場東北二十里永樂二年置

古窰浦閘 宋慶曆間置與淹浦為鳴鶴一鄉之
關紐今為鹽丁載漕者啟閉焉

白洋湖閘

淹浦閘 場西北四里

向頭巡檢司城

觀海衛 明置指揮使今廢

金仙禪寺 舊名福林寺初自梁武帝宋治平間
改賜今額寺負鳴鶴山之陽土人遂呼山為寺
山鹽場置其下

東作西河縣志 卷一
清泉場在鎮海縣崇邱一都一畝地方去運司五百
二十里東至小港口十里西至楊木堰三十五里
南至徐家洋十里北至海十里

山川

招寶山 場北十二里舊名侯濤山後以諸番入
貢停舶改名招寶巔設臺堠海上人云山頂望
日出海雲生樹石巖屋聽風雨迴異人世

金雞山 與招寶對峙以形得名

虎蹲山 屹峙海中亦以形名

游山 在海中

布陣嶺 場南十里宋高宗禦金兵布陣於此

孔墅嶺 在青峙山之東

青嶼嶺 場東南十五里

澥浦嶺 在管界巡司側

古蹟

東江礮 明知縣宋繼祖建運鹽由此達鄞城

覺海教寺 唐會昌二年建名清海寺宋大中祥

符初改今額

長山橋場東南運鹽河經此

義成橋場東會昌二年與公前...

龍頭場在鎮海縣靈緒鄉地方去運司四百八十里

東至鎮海縣六十里西至鳴鶴場界四十里南至

鴈門嶺十五里北至大海五里

山川

東霍山 在昌國東北海中世傳徐福至此有石

棋枰修竹環之風枝掃拂常無塵垢

伏龍山 場北十二里一名箬山首尾跨東西海

門蜿蜒如龍

大蓬山 場西南五里一名達蓬山俗傳秦始皇

東遊至此欲達蓬萊因名

蛟門 在海中又名嘉門

蟹浦山 下有所城

施公山 地極險元至元間勅巡檢司以禦之置

烽堠其上

鴈門嶺 西南慈谿界

古蹟

龍頭城 明建即石塘團舊址

覺度教寺 宋寶祐初建名松林庵元至元間改

今額

穿山場在鎮海縣海晏二都地方去運司五百九十六里東至鄆衢所三十里西至長山場四里南至海三十里北至海一里

山川

大榭山 廣百里土肥民稠山田塗蕩數千餘頃
羅山 有城長山場舊署

東關山 場東北

山門浦 下有團上有礮通鹽運

古蹟

穿山城 明洪武二十七年築徙定海衛後所官軍守之

後所 在海晏二都之穿山洪武間信國公湯和徙大小榭海島居民於此

鄆衢千戶所 在海晏三都宋置鄆衢驛洪武間湯和建所

東作西洋圖志 卷一
長山場在鎮海縣東南羅山城去運司五百六十里
東至穿山場三十里西至清泉場三十里南至育
王嶺二十里北至海

山川

算山 場西七里下有礮通鹽運

清涼山 場西八里

小山 場東四里下有礮

三山 在昌國西海中運鹽出五龍汊經此

蛟門山 在海口與荷葉山黃茅山對峙為海門

運鹽出此由海道入鎮海關

古蹟

穿山大礮 場東一里宋慶曆七年王安石宰鄞

築堤捍浦於堤西石巖鑿三竅為礮闊三丈六

尺高三丈因名穿山

貝家礮 穿山礮東

楊家礮 貝家礮東

小山礮 楊家礮東以上諸礮俱通鹽運

大嵩場在鄞縣十一都一畝地方去運司六百六十

東作同治縣志卷一
里東至大海七里西至韓嶺五十里南至湖頭渡
二十里北至定海縣五十里

山川

太白山 場東二里視諸山最高其巔有龍池雲
霧翳勃生於水面若麗日晴宵澄澈如鏡或風
振林木葉落無墮池中者旱禱雨隨至

福泉山 在錢湖之東上有龍井水泉紺冽故名
去舊場基不百武

瞻崎嶺 在福泉山之北瞻崎頭海岸因名

竹山 大嵩場住居其下

球琳山 竹山之北

穿鼻山 太白山之右

沙井山 大嵩江南岸

桃花山 產茶甚甘美世傳安期生煉藥於此嘗
以醉墨灑石成桃花紋故名

岱山 在蓬萊鄉周圍四百餘里

橫山 橫於台明之境因名

黃牛礁 鎮海定海兩邑水程往來之半鹽運海

道經此

古蹟

大嵩城 明洪武二十年築

福泉精舍 在福泉山

岱山書院 宋魏榘建故酒坊基也黃震有記

大嵩江橋 場南有江心廟

桐橋 舊名高橋俗呼洞橋在場西

金雞橋 跨大嵩江

玉泉場在象山縣十六都二畝地方去運司七百八

十里東至爵溪千戶所二十五里西至象山縣十里南至昌國衛八十里北至湖頭渡四十里

山川

象山 縣治北三十步形肖伏象山頂有望海樓

山半南有觀瀾亭北有白鹿飲泉亭東有大老

巖巖下有圓峰寺

瑞龍山 周圍盤屈如龍在縣北

屏風山 縣北過此為湖頭渡接鄞奉境運鹽經

此

東介河清縣志卷一
梅溪山 縣東里許其巔有文峰埕埕置其下

珠山 埕東北一里山頂一石圓聳如珠四巖有古檜多異卉土出白堊

平沙巖 昌國南門外海邊羣石嶙峋獨此高數十丈平如席有細沙如麪其色黃以潮盈縮為隱見

珠溪 埕東北源出珠山流入陳兆塘入海

爵溪 埕東南源出前畧嶺

湖頭渡 舊為陳山渡運鹽從此出口

黃溪渡 縣西北十里

古蹟

鋸門洞 在鋸門山巖半壁中闊三丈許其員如規洞內有二潭中一石筍如柱下橫石如闕洞口石壁兩分如左右手潮至洞下聲震如雷宋寶慶志云世傳五龍聚會於此每歲上巳人候潮退入洞觀之有巖花石乳續紛懸墜下有五色石子瑩潤可愛更進四五丈則寒威凜然不可復入旱時投以朱書鐵簡風雨頻應

昌國衛 場西南舊有昌國監鹽場明弘治間廢

爵溪所 場東南十里

台州府

長亭場在寧海縣東一百三十里去運司九百三十里東至象山縣三十里西至臨海縣一百六十里南至海北至奉化縣一百二十里

山川

帽尖山 場北以形似名上有龍湫歲旱有微雲覆其上必雨

星愚山 形如圍屏亦名五幅山左獅子巖右香

花山長亭場坐其下民居蒼蔚大海繞之

青珠山 在東海上

杜鵬山 場西北十里

躍龍山 先名臥龍山又名映霞山俗呼應家山

上有鶴林庵

許家嶺 場北界

古蹟

寶輿巡司城 順治十八年遷康熙九年復下為

靈輿團舍

松舉塘 場東南瀕海

鶴林庵 在躍龍山

方正學先生祠 在躍龍山

大覺堂 長亭場鹽課司習儀處在港頭宋時置

黃巖場在太平縣十都地方去運司一千二百九十

里東至海十里西至太平縣三十里南至松門衛

界四十里北至海門衛界五十里

山川

盤馬山 在海上山形四斷盤旋如馬

白峰山 場南巖石巉險巖畔有穿石洞

錦雞山 一名雞鳴山下為新河所有鹽倉舊傳

錦雞鳴其上遂名

戴山 下為黃巖場基屬太平縣境

松門山 在海中王羲之西郡記云永寧縣界海

中有松門島嶼上皆生松故名宋時有松門寨

明改為衛今廢下皆鹽場竈舍

新河 戴山西北通新河所漕運鹽運皆由於此

迂浦 近海凡水鄉河涇皆由此宣洩皆由北

古蹟

永豐閘 宋元祐間提刑羅適建淳熙間朱熹修
元大德中復修今圯

黃板橋 通金清閘本石梁也今名石橋頭涵丁

運涵經此

海塗鐵盤 新河海塗上明成化間居民獲一鐵
盤大如車輪重數千斤輾中鑄文有二十八宿
及十二肖之象或云朱熹提舉水利時鑄此器

鎮海口

杜瀆場在臨海縣東南承恩鄉去運司一千一百七
十里東至大海十里西至分水嶺五十里南至海
門衛五十里北至蛟湖巡檢司三十里

山川

巾子山 縣東南二里相傳仙人皇華居山上飛
昇墮幘一名恰幘峰

輕盈山 下為輕盈團窰舍

白鶴山 寰宇記山上有湖中多盤石昔有白鶴

自飛入會稽雷門鼓中擊之聲震洛陽故名

海門山 場東南十里瀕海

椒江 江面二十餘里受臨黃天仙四邑之水合

靈江永寧江同流入海運鹽自輕盈浦入江

古蹟

桃渚所 明正統八年置今為寨

前所 明洪武二十八年置今亦為寨

鶴井 在杜瀆監側舊傳鶴舞其上故名

杜瀆 海水漲入遂成溝澮因名瀆廣袤三四里

漑田百餘頃

溫州府

長林場在樂清縣六都地方去運司一千三百九十

六里東至大海西至館頭驛四十里南至大海北

至舊北監場三十里

山川

東塏山 縣治東聳立與西塏山對峙陰陽家目

為魁峰邑令葛逢以大尖山石塏改遷於此明

設鹽課司其下

芙蓉山 西南三峰巖石並高三四尺森然如芙蓉紅赤相映下皆鹽丁開坦地

白石山 唐天寶間改名五色山高千餘丈純石無土木乃十二真君所居之地名白石洞天宋

太平興國中真華觀道士李少和辟穀居此

鴈蕩山 縣東九十里為峰百有二為谷十為洞

八為巖三十本諾矩羅尊者道場宋太平興國

間僧全了神朗先後結廬於此天聖間僧文吉

又居之蹟始盡顯詳見元李孝光鴈山十記

白沙嶺 有關有墩臺下為鹽丁開坦地

芳林嶺 嶺背有堂宋建下為鹽丁開坦地

古蹟

蒲岐所 明洪武年置

古塢山寺 宋天禧元年建為僧全了塢今場署

遷置其下

本覺寺 在大芙蓉山唐乾寧二年建

白塢寺 宋天聖間建明洪武六年僧道成重建

萬橋 宋萬規建通鹽運

東介河... 卷一
天富北監 在玉環鄉明初隸樂清縣設鹽場洪武初遷於白沙

本朝康熙三十九年并入長林

雙穗場在瑞安縣五都長橋地方去運司一千四百九十六里東至海西至海安千戶所并官舖小河一帶南至安陽江口一十八里北至永嘉縣四十里

山川

白巖山 縣治東南居蒼龍角又名龍山舊有白

鹿啣花之瑞稱白鹿巖宋大觀間造浮屠於其頂

篔簹山 場東五里昔處士李月泉修煉於此多竹又名君子山狀如卓筆宋儒林石隱其下

拱瑞山 在東山河口中流明萬曆間邑令齊柯濬河積土成之以鎮水口

雲頂山 場北里許有齊雲洞漱玉潭雲頂瀑三澗潭

安陽江 縣南門外舊名安固江三國吳時名羅

東仙河沙縣志 卷一
陽江唐時名瑞安江又名飛雲江有二源一出
福建政和縣一出處州青田縣

飛雲渡 在南門外宋林景熙有詩兩岸民地借
鹽丁開坦

古蹟

梅頭城 在後岡明嘉靖間築

仙巖聖壽禪寺 在仙巖山宋至道間建陳傅良
讀書於此朱熹訪之書溪山第一四字

東捨廣福講寺 宋開寶間建

海山鍾秀坊 為永嘉場仕宦立在五都

永嘉場在永嘉縣二都永興堡去運司一千四百六
十六里東至海西至茅竹嶺三十里南至中界山
巡檢司界一十里北至寧村千戶所馬道江一十
五里

山川

華蓋山 一名東山有容成太玉洞為天下第十
八洞天相傳黃帝時容成子修道於此下為華
蓋鄉明初設鹽場於此今廢

大羅山 一名泉山漢朱買臣言越王居泉山即

此廣袤四十里上有菊花潭臥龍潭玉涵潭龍

須潭五美巖飛來巖動石茶山霹靂尖

白水山 一名石室山上有石夫人及古碑其巔

有白水在永嘉場東

青山 場北三十里兩山如門宋顏延之於此立

亭觀海

瑤溪 本名姚溪場東北明張孚敬有記

古蹟

寧村城 明洪武間湯和築

黃華城 明崇禎五年兵備道許成章築

永嘉堡 在海口明嘉靖二十七年巡鹽御史林

儒築

永昌堡 在場東英橋里明嘉靖三十七年築

黃石陡壘 在寧村所城北舊名方汊

江心一覽亭 華蓋山頂今名大觀亭

資福寺 在華蓋山林靈素築室於此宋高宗巡

幸賜今額

乾元寺 石晉開運間建

張文忠祠 祀明大學士張孚敬

勅修兩浙鹽法志卷一終



